

## 41 sindics a àn zurât in lenghe furlane

Sodisfazion pandude dal president de ARLeF.  
Cisilino: «Cuasi la metât dai prins citadins e à zurât par furlan.  
Une sensibilitât che, o soi sigûr, e cressarà tal timp»

Cuaranteun a son stâts i sindics di gnove nomine che, dopo des ultimis elezions amministrativis, a àn decidût di fâ il lôr zurament ancje in lenghe furlane.

Chest al è un dât une vore impuartant, al à comentât cun gjonde il president de ARLeF, Eros Cisilino: «Al è un fat pardabon significatîf che cuasi la metât dai sindics dai Comuns di lenghe furlane e vedi zurât par furlan. Lis Aministrazions a àn capît la impuortance dal doprâ la lenghe furlane te aministrazion publiche, un aspjet che al è ancje previodût tal “Plan gjenerâl di politiche linguistiche pe lenghe furlane 2021-2025”. O pensi che chest al sedi un risultât positîf di une politiche linguistiche che e met i dirits identitaris dai citadins al centri de ativitât de aministrazion publiche. Al è un dât che al puarte la Regjon Friûl-Vignesie Julie intune posizion pardabon buine a nivel european in cont de tutele des lenghis minoritariis. I ten a ringraciâ lis Aministrazions pe sensibilitât che a àn mostrât e che no podarà che cressi tal timp: la Agenzie Regjonâl pe Lenghe Furlane e sarà simpri il lôr riferiment sigûr e cualificât».

Cualchi setemane indaûr, la ARLeF e veve mandât ai prins citadins une note cu la formule dal zurament in lenghe furlane par facilitâ cui che al ves vût il desideri di fâlu par talian e furlan. Il numar alt di sindics che a àn sielt cheste pussibilitât (ven a stâi il 42% dai Comuns di lenghe furlane là che si son davueltis lis ultimis elezions amministrativis) si zonte ai 20 conseîrs regjonâi che a àn recitât ancje par furlan la formule rituâl, in ocasion de prime sentade de XIII legislature dal Consei regjonâl dal Friûl-Vignesie Julie, tal Avrîl dal 2023. Cun lôr ancje il president de Regjon, Massimiliano Fedriga, che al veve zurât in dutis cuatri lis lenghis dal teritori: talian, furlan, sloven e todesc.

Udin, ai 22 di Lui dal 2024

**INFORMAZIONS PE STAMPE - INFORMAZIONI PER LA STAMPA**

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<